

# **PREDNACRT ODLUKE O ZAŠTITI IZVORIŠTA**

Na osnovu člana 23. stav 2. Zakona o vodama Srednjobosanskog kantona ("Službene novine SBK", br. 11/09), a u skladu sa članom 13. stav 2. Pravilnika o uslovima za određivanje zona sanitarne zaštite i zaštitnih mjera za izvorišta voda koje se koriste ili planiraju da koriste za piće ("Službene novine FBiH", broj 88/12), Općinsko vijeće Travnika donosi:

## **ODLUKU O ZAŠTITI IZVORIŠTA PLAVA VODA**

### **I OPĆE ODREDBE**

#### **Član 1.**

Ovom odlukom utvrđuju se zone sanitarne zaštite izvorišta Plava voda (u daljem tekstu: izvorišta), sa kojih se vrši snabdijevanje vodom za piće potrošača na području općine Travnik, a u budućnosti i općina Novi Travnik, Vitez, Busovača i Zenica, veličina i granice zona sanitarne zaštite, mjere i režimi zaštite, nadzor nad provođenjem ove odluke, kaznene odredbe i druga pitanja od interesa za provođenje sanitarne zaštite izvorišta.

#### **Član 2.**

Izvorište Plava voda nalazi se u Travniku, na vrelu istoimene rijeke koja se ulijeva u rijeku Lašvu.

#### **Član 3.**

Uticajno područje izvorišta je hidrogeološki sliv površine 80,0 km<sup>2</sup>. Ovom odlukom utvrđuje se zaštita izvorišta, uspostavljanjem i održavanjem zona sanitarne zaštite i zaštitnih mjera, utvrđenih u skladu sa lokalnim uslovima, na osnovu provedenih istražnih radova i stručnog elaborata.

#### **Član 4.**

Utvrđivanje zona sanitarne zaštite i zaštitnih mjera vrši se u cilju zaštite voda izvorišta od svih vidova zagađenja i štetnih uticaja koji mogu nepovoljno djelovati na higijensku ispravnost vode za piće ili na izdašnost izvorišta.

#### **Član 5.**

Urbanističko uređenje prostora, građenje, privredne, poljoprivredne i druge djelatnosti mogu se vršiti samo na način i u mjeri koji su utvrđeni ovom odlukom.

Privredna društva, federalni, kantonalni i općinski organi uprave, druga pravna lica i građani dužni su pridržavati se odredbi ove odluke i primjenjivati propisane mjere zaštite.

### **II ZONE SANITARNE ZAŠTITE I ZAŠTITNE MJERE**

#### **Član 6.**

U skladu sa Pravilnikom o uslovima za određivanje zona sanitarne zaštite i zaštitnih mjera za izvorišta voda koje se koriste ili planiraju da koriste za piće ("Službene novine FBiH", br. 88/12), izvorište Plava voda predstavlja izvorište podzemnih voda u kraškoj izdani.

Za izvorište se utvrđuju slijedeće zone sanitarne zaštite:

1. I. zaštitna zona (zona sa najstrožijim zabranama i ograničenjima)
2. II. zaštitna zona (zona sa strogim zabranama i ograničenjima)
3. III. zaštitna zona (zona sa umjerenim zabranama i ograničenjima)
4. IV. zaštitna zona (zona sa preventivnim zabranama i ograničenjima)

### **1. I ZAŠTITNA ZONA (zona sa najstrožijim zabranama i ograničenjima)**

#### Član 7.

Područje I zaštitne zone izvorišta obuhvata prostor oko vodozahvatnih objekata, kojim se vodozahvatni objekti štite od slučajnog ili namjernog zagađenja ili oštećenja.

Ukupna površina I zaštitne zone oko izvorišta Plava voda iznosi 2,08 ha, a obim 643m.

Granica I zaštitne zone ide od ograde i ulaza prema crpnoj i hlornoj stanici, na sjeverozapad parcelom K.Č. 527, zatim južnom granicom parcele K.Č.523, zatim prema sjeveru granicom parcele K.Č.52, izlazi na lokalnu cestu, zatim granicom parcele K.Č.519, nastavlja uz cestu Travnik –Bukovica.

Sa ceste ide prema jugu i presijeca parcele K.Č. 544 i 545 i spaja se sa granicom sliva, istočno od preljevnog organa, na postojećoj brani. U ovu zonu ulaze i svi postojeći objekti za vodosnabdijevanje Travnika, te objekat brane.

#### Član 8.

Područje I zaštitne zone u vlasništvu je Općine Travnik.

Općina Travnik će u skladu sa važećim propisima o eksproprijaciji regulisati pitanje imovinsko-pravnih odnosa sa sadašnjim vlasnicima zemljišta na području I zaštitne zone.

#### Član 9.

Pored postojećih objekata, u I zaštitnoj zoni, mogu se, uz primjenu propisanih mjera zaštite, graditi ili nalaziti i drugi vodoprivredni objekti, kao što su vodozahvatni objekti, rezervoari, pumpne stanice, trafo-stanice, administrativni objekti, prilazni i unutrašnji putevi i drugi objekti koji su neophodni za rad sistema za vodosnabdijevanje.

#### Član 10.

Vodnim i drugim objektima iz člana 9. ove odluke koji služe za vodosnabdijevanje Travnika, upravljat će i dalje JKP "Bašbunar" do izgradnje i puštanja u rad regionalnog vodovodnog sistema kada će ove poslove da preuzme JP RV „Plava voda“ d.o.o. Travnik.

JKP "Bašbunar" je nadležno za provođenje svih zaštitnih mjera propisanih ovom odlukom do izgradnje i puštanja u rad regionalnog vodovodnog sistema kada će ove poslove da preuzme JP RV „Plava voda“ d.o.o. Travnik.

JP RV „Plava voda“ d.o.o Travnik je dužno da namjenska sredstva dobivena za zaštitu izvorišta u okviru realizacije Projekta „Plava voda“ investira u skladu sa odredbama ove odluke.

## Član 11.

Područje I zaštitne zone mora biti zaštićeno od neovlaštenog pristupa ogradom, kao i drugim potrebnim mjerama fizičke zaštite i osiguranja.

Ograda iz prethodnog stava ovoga člana mora biti izvedena na način da spriječi neovlašteni ili nasilni ulazak na područje I zaštitne zone.

## Član 12.

JKP "Bašbunar" je dužno da na odgovarajući način obilježi I zaštitnu zonu, što naročito uključuje naziv izvorišta i zaštitne zone, naziv preduzeća, broj dežurnog telefona za hitne slučajeve i upozorenje o zabrani neovlaštenog pristupa.

## Član 13.

Pristup na područje I zaštitne zone dozvoljen je samo ovlaštenim osobama, što uključuje zaposlenike JKP "Bašbunar" koji stalno ili povremeno rade na objektima unutar ove zone i nadležnim inspekcijским organima u toku vršenja redovnih ili vanrednih kontrola ove zone, kao i drugim licima uz posebno odobrenje JKP "Bašbunar".

Sva lica iz prethodnog stava ovoga člana moraju posjedovati odgovarajuće propusnice kako bi mogla pristupiti prostoru I zaštitne zone. Vrste propusnica i uslovi njihovog izdavanja utvrđeni su općim aktima JKP "Bašbunar".

## Član 14.

Lica koja stalno ili povremeno rade na objektima unutar I zaštitne zone moraju biti podvrgnuta periodičnim liječničkim pregledima, u skladu sa odgovarajućim propisima o sanitarnoj zaštiti.

## Član 15.

Na području I zaštitne zone izvorišta, zabranjuju se sve aktivnosti koje nisu u direktnoj vezi sa normalnim radom i održavanjem vodozahvatnih objekata. Aktivnosti koje se provode u cilju normalnog rada i održavanja vodozahvatnih objekata ne smiju štetno djelovati na izvorišta.

Izuzetno od odredaba iz stava 1. ovoga člana, JKP "Bašbunar" je dužno da zemljište u I zaštitnoj zoni zasije travom i rastinjem plitkog i vezanog korijenja, pri čemu je najstrožije zabranjena upotreba prirodnog ili vještačkog đubriva, hemijskih sredstava za zaštitu bilja, kao i drugih agrotehničkih sredstava.

Izuzetno od odredaba iz stava 1. ovoga člana, dozvoljeno je provođenje kanalizacije i drugih instalacija, koje služe za normalan rad objekata za vodosnabdijevanje, u kom slučaju je odgovarajućim projektnim i izvođačkim rješenjima potrebno osigurati da te instalacije ne mogu direktno ugroziti izvorišta.

## **2. II ZAŠTITNA ZONA (zona sa strogim zabranama i ograničenjima)**

## Član 16.

Područje II zaštitne zone obuhvata prostor od granice I zaštitne zone iz člana 7. ove odluke do vanjske granice II zaštitne zone.

Vanjska granica II zaštitne zone ide od zapadne granice I zone do kote 600 m n.m i onda prema sjeveru do Donje Čatrnje do kote 800 m n.m., zatim na istok preko potoka Durak do vrha na koti 936 m n.m, gdje skreće jugoistočno prema Velikoj peći do kote 600 m n.m. i zatim granicom sliva na zapad do kote 500 m n.m. gdje se spaja na granicu I zaštitne zone izvorišta.

Ukupna površina II zaštitne zone je 50,38 ha, dok je obim ovoga područja 2.966 m.

#### Član 17.

Na području II zaštitne zone izvorišta, zabranjuju se sve aktivnosti koje nisu u direktnoj vezi sa normalnim radom i održavanjem vodozahvatnih objekata. Aktivnosti koje se provode u cilju normalnog rada i održavanja vodozahvatnih objekata ne smiju štetno djelovati na izvorište.

Izuzetno od odredaba stava 1. ovoga člana, dopuštaju se slijedeće aktivnosti u obimu koji ne utiče na kvalitet vode na izvorištu:

- nekomercijalni uzgoj trave, pri čemu se dozvoljava upotreba prirodnog i vještačkog đubriva u obimu koji ne ugrožava kvalitet vode na izvorištu;
- provođenje kanalizacije i drugih instalacija, koje služe za normalan rad objekata za vodosnabdijevanje, u kom slučaju je odgovarajućim projektnim i izvođačkim rješenjima potrebno osigurati da te instalacije ne mogu ugroziti izvorište;
- kretanje stanovništva bez ograničenja i kontrolisane rekreativne aktivnosti, što može uključiti staze za šetnju, džoging i vožnju bicikala, parkove za šetnju i sjedenje i sl., pri čemu nije dozvoljena izgradnja sportskih i rekreacionih objekata;
- održavanje postojećih stambenih objekata, čije se sanitarne otpadne vode moraju prikupiti i transportovati propisno projektovanim i izvedenim vodonepropusnim kanalizacionim sistemom. Prvenstveno sa aspekta prihvata i odvođenja otpadnih voda, te uklanjanja čvrstog otpada, pri čemu nije dozvoljena promjena namjene objekata.

U slučajevima kada se ne vrši prečišćavanje prikupljenih sanitarnih otpadnih voda iz prethodnog stava ovog člana, sanitarne otpadne vode moraju se ispustiti izvan područja I, II i III zaštitne zone izvorišta.

### **3. III ZAŠTITNA ZONA (zona sa umjerenim zabranama i ograničenjima)**

#### Član 18.

Prostor III zaštitne zone izvorišta obuhvata slijedeće površine:

1. Područje ponora-vrtača, ovo područje se nalazi u reonu Konjske i obuhvata u potpunosti parcele: od K.Č.2602 do K.Č. 2642. Na južnoj granici parcele K.Č. 2604 izlazi na lokalni put i ide prema zapadu do zapadne granice parcele K.Č.2635.
2. Rasjedi-granica ove zone ide na zapad od vanjske granice II zone, granicom sliva do izvora Baš bunar, zatim na sjever do vrha Kukrike na koti 920 m n.m., zatim na istok

do vrha Gornja Čatrnja na koti 1.022 m n.m. i dalje iznad naselja Velika Bukovica i Mala Bukovica, te Guča Gora preko kote 1.073 m n.m. i zatim prema naselju Mosor, prema jugoistočnoj granici sliva, preko kote 783 m n.m., zatim ponovo na zapad preko sjevernih padina Grabove glavice, prolazi podnožje vrha Kotol, spaja se sa granicom sliva i ide do istočne vanjske granice II zaštitne zone.

Površina III zaštitne zone-ponori vrtače iznosi 22,26 ha i obim je 1.969 m.

Površina III zaštitne zone-rasjedi iznosi 370,16 ha i obim je 11.504 m

Ukupna površina III zaštitne zone izvorišta Plava voda iznosi 392,42 ha.

## Član 19.

Na području III zaštitne zone izvorišta zabranjeno je izvođenje radova, izgradnja objekata i obavljanje aktivnosti kojima se mogu zagaditi vode izvorišta, a naročito:

1. izgradnja novih naselja, te izgradnja i rad kanalizacije, osim ako vodonepropusnost kanalizacionih vodova nije obezbijeđena i kontrolirana;
2. izgradnja i nekontroliran rad sportskih i rekreacionih objekata, bez vodonepropusne kanalizacije;
3. formiranje gradilišta i gradilišnih naselja bez sanitarija i vodonepropusne kanalizacije;
4. izgradnja i rad uređaja za prečišćavanje otpadnih voda i uređaja za spaljivanje čvrstog otpada;
5. direktno ili indirektno ispuštanje otpadnih voda u vodonosni sloj, kao i prečišćenih i neprečišćenih otpadnih voda na tlo, uključujući pražnjenje vozila za čišćenje i odvoz fekalija;
6. izgradnja i eksploatacija izvorišta i bunara koji se ne koriste za javno vodosnabdijevanje;
7. privredne i druge aktivnosti kojima se narušava prirodni režim prihranjivanja podzemnih voda izvorišta, ukoliko se posebnim mjerama ne osigura vještačko prihranjivanje u količini dovoljnoj za nadoknađivanje izgubljene količine;
8. odlaganje svih vrsta čvrstog otpada i izgradnja deponija, uključujući sanitarne deponije;
9. izgradnja i rad industrijskih i zanatskih pogona uključujući pogone sa nečistom tehnologijom, koji ispuštaju radioaktivne ili druge za vodu štetne i opasne materije (nuklearni reaktori, petrohemijska industrija, metalo-prerađivački pogoni, hemijske tvornice, kožarska industrija i drugo);
10. izgradnja i rad željezničkih i ranžirnih stanica i terminala i autobusnih stanica, ukoliko nisu poduzete posebne mjere kojim se sprečava zagađivanje izvorišta;
11. izgradnja i korištenje skladišta rastvorljivih materija opasnih i štetnih za vodu;
12. prerada, manipulacija i skladištenje hemikalija, tečnih goriva, maziva i drugih opasnih i štetnih materija;

13. izgradnja i rad stočnih i peradarskih farmi, osim uzgoja do 10 grla krupne stoke i peradi u individualnim domaćinstvima za vlastite potrebe, uz i zgradnju i pravilan rad vodonepropusne kanalizacije, odnosno vodonepropusne septičke jame;
14. otvoreno uskladištenje i primjena hemijskih sredstava opasnih i štetnih za vodu, koja se koriste za zaštitu i rast bilja i za uništenje korova;
15. izgradnja i eksploatacija cjevovoda za transport hemikalija, tečnih goriva, maziva i drugih opasnih tečnosti;
16. cestovni transport hemikalija, tečnih goriva, maziva i drugih opasnih materija;
17. izvođenje istražnih bušotina za naftu, zemni plin i druge opasne i štetne materije, kao i za mineralnu vodu;
18. izgradnja i korištenje poletno-sletnih staza, sigurnosnih površina i površina za prisilno slijetanje u zračnom saobraćaju;
19. izgradnja i korištenje manevarskih i vojnih poligona;
20. izgradnja novih grobalja i proširenje i korištenje postojećih, osim kada se ona nalaze u područjima koja izgrađuju hidrogeološki nepropusne formacije;
21. sječa šume, osim uzgojno-sanitarnih mjera;
22. izgradnja puteva, izvođenje obimnih zemljanih iskopa i druge aktivnosti koje izazivaju ili pospešuju eroziju tla;
23. eksploatacija mineralnih sirovina;
24. eksploatacija šljunka;
25. i druge aktivnosti za koje se utvrdi da mogu imati negativne posljedice za izvorište.

#### Član 20.

Na području III zaštitne zone mogu ostati već postojeći stambeni i vikend objekti izgrađeni u skladu sa važećim propisima, kao i individualni objekti za uzgoj stoke i peradi u naseljima Mala i Velika Bukovica, Mosor, Maline i Guča Gora, kao i drugim naseljima na području ove zone.

Na objektima iz prethodnog stava dozvoljeni su radovi usmjereni na tekuće održavanje, a u skladu sa uslovima definisanim aktom o građenju, izdatim od strane nadležnog organa.

Sanitarne otpadne vode iz objekata na području III zaštitne zone iz stava 1. ovoga člana moraju se prikupljati i transportovati propisno projektovanim i izvedenim kanalizacionim sistemom. Kanalizacioni sistem mora biti vodonepropustan na području III zaštitne zone.

U slučajevima kada se ne vrši prečišćavanje prikupljenih sanitarnih otpadnih voda iz prethodnog stava ovoga člana, sanitarne otpadne vode moraju se ispustiti izvan područja I, II i III zaštitne zone izvorišta Plava voda.

#### **4. IV ZAŠTITNA ZONA (zona sa preventivnim zabranama i ograničenjima)**

#### Član 21.

Prostor IV zaštitne zone izvorišta obuhvata površinu čija granica ide vanjskom granicom III zaštitne zone , na istok iznad naselja Velika i Mala Bukovica i izlazi na lokalni put iznad naselja Mosor. Zatim ide na sjever i prolazi zapadno od naselja Krpeljići, prema Radonjićima do vrha Perčin. Od vrha Perčin ide prema Probijenom brdu i skreće na istok prema naselju Suhi dol. Od ovog naselja granica skreće na zapad, ispod vrha Oštrilo i dalje na sjever prema planini Kozica. Zatim ide na zapad preko Vlašićkog platoa prema Crnom vrhu i dalje preko vrha Jezera na koti 1505 m n.m., skreće na jug prema Kukotnici i prolazi ispod vrha Kragulj, gdje je najdalja sjeverozapadna točka sliva Plave vode. Tu granica skreće prema jugu i ide južnim vrhom padina Galice, prema Paklarskim stijinama, prema vrhu Brajkovica, gdje skreće južno prema naselju Jankovići i onda kod Bašbunara se spaja sa granicom III zaštitne zone.

## Član 22.

Na području IV zaštitne zone izvorišta zabranjeno je izvođenje radova, izgradnja objekata i obavljanje aktivnosti kojima se mogu zagaditi vode do izvorišta, a naročito:

1. Izgradnja i rad uređaja za prečišćavanje otpadnih voda i uređaja za spaljivanje čvrstog otpada;
2. direktno ispuštanje neprečišćenih otpadnih voda u vodotoke i prečišćenih i neprečišćenih otpadnih voda na tlo, uključujući pražnjenje vozila za čišćenje i odvoz fekalija;
3. izgradnja i rad industrijskih i zanatskih pogona sa nečistom tehnologijom, koji ispuštaju radioaktivne ili druge za vodu štetne i opasne materije (nuklearni reaktori, petrohemijska industrija, metaloprerađivački pogoni, hemijske tvornice, kožarska industrija i drugo), kao i ostalih industrijskih i zanatskih pogona;
4. prerada, manipulacija i skladištenje hemikalija, tečnih goriva, maziva i drugih opasnih i štetnih materija;
5. izgradnja i eksploatacija cjevovoda za transport hemikalija, tečnih goriva, maziva i drugih opasnih tečnosti, ukoliko nisu poduzete posebne mjere kojim se sprječava infiltracija ovih tečnosti u podzemnu vodu;
6. cestovni transport hemikalija, tečnih goriva, maziva i drugih opasnih materija, bez provedenih mjera zaštite voda i odobrenja i pratnje službi ministarstva unutrašnjih poslova;
7. otvoreno uskladištenje i primjena hemijskih sredstava opasnih i štetnih za vodu, koja se koriste za zaštitu i rast bilja i za uništenje korova;
8. izgradnja i korištenje poletno-sletnih staza, sigurnosnih površina i površina za prisilno slijetanje u zračnom saobraćaju;
9. izgradnja i korištenje manevarskih i vojnih poligona;
10. izgradnja i rad stočnih i peradarskih farmi, ukoliko nisu poduzete posebne mjere kojim se sprječava zagađivanje podzemnih voda izvorišta;
11. odlaganje svih vrsta čvrstog otpada izvan sanitarnih deponija, kao i na sanitarne deponije, osim kada se one nalaze u područjima koja izgrađuju hidrogeološki nepropusne formacije;

12. eksploatacija mineralnih sirovina, osim ako se utvrdi da se tom aktivnošću ne ugrožava kvalitet podzemne vode na izvorištu;
13. eksploatacija kamena i šljunka, osim iz posebno kontroliranih i zaštićenih kamenoloma i šljunkara;
14. i druge aktivnosti za koje se utvrdi da mogu imati negativne posljedice za izvorište.

#### Član 23.

Izuzetno od odredaba iz člana 24. ove odluke, na području IV zaštitne zone dozvoljava se rad postojećih privrednih i trgovačkih preduzeća, odnosno egzistiranje postojećih industrijskih i drugih privrednih objekata, odnosno benzinskih stanica.

Privredni subjekti i sportski objekti iz prethodnog stava ovog člana ne mogu proširivati vrstu i obim svoje djelatnosti u odnosu na stanje zatečeno u trenutku donošenja ove odluke.

Privredni subjekti iz stava 1. ovog člana dužni su pridržavati se odredbi ove odluke i primjenjivati propisane i druge mjere zaštite.

### III NADZOR NAD PROVOĐENJEM OVE ODLUKE

#### Član 24.

Upravni nadzor nad provođenjem ove odluke obavlja općina u skladu sa Zakonom o vodama SBK-a.

#### Član 25.

Inspeksijski nadzor nad provođenjem ove odluke odnosno nad sprovođenjem režima i mjera zaštite propisanih ovom odlukom vrše nadležni inspeksijski organi u skladu sa važećim propisima.

### IV KAZNE NE ODREDBE

#### Član 26.

Novčanom kaznom od 1.000 do 5.000 KM kazniće se za prekršaj pravno lice:

1. ako vrši izvođenje radova, izgradnju ili rekonstrukciju objekata ili obavlja aktivnosti protivno zaštitnim mjerama propisanim u čl. 15., 17., i 19. ove odluke;
2. ako ne postupi u skladu sa čl. 11. 12. i 14. ove odluke;
3. ako ne izvrši ili neblagovremeno izvrši radnje iz čl. 29. i 30. ove odluke.

Za prekršaj iz stava 1. ovoga člana kaznit će se i odgovorno lice u pravnom licu novčanom kaznom u iznosu od 300 do 1.000 KM.

#### Član 27.

Novčanom kaznom od 200 do 500 KM kazniće se za prekršaj fizičko lice:

1. ako vrši izvođenje radova, izgradnju ili rekonstrukciju objekata ili obavlja aktivnosti protivno zaštitnim mjerama propisanim u čl. 15., 17. i 19. ove odluke;
2. ako ne izvrši ili neblagovremeno izvrši radnje iz čl. 20. ove odluke.

## **V PRELAZNE I ZAVRŠNE ODREDBE**

### Član 28.

Sastavni dio ove odluke je grafički prilog na kome su prikazane granice zona sanitarne zaštite izvorišta.

### Član 29.

Na područjima zaštitnih zone izvršit će se uređenje prostora i provođenje zaštitnih mjera u skladu sa ovom odlukom i projektom zaštite u roku od tri i pol godine od dana njenog donošenja.

Općina Travnik dužna je izvršiti radnje iz člana 8. ove odluke u roku od šest mjeseci od dana njenog donošenja.

JKP "Bašbunar" dužno je izvršiti radnje iz čl. 11. i 12. ove odluke u roku od šest mjeseci od dana njenog donošenja.

JP RV „Plava voda“ d.o.o. Travnik je dužno nakon izgradnje i puštanja u rad regionalnog vodovodnog sistema preuzeti sve poslove zaštite izvorišta.

Uklanjanje individualnih objekata za uzgoj stoke i peradi mora se izvesti u roku od dvije godine od dana njenog donošenja.

Kanalizacioni sistemi iz člana 20. ove odluke moraju se izvesti u roku od tri i pol godine od dana njenog donošenja.

### Član 30.

Donosioci planskih dokumenata (prostorni plan, planovi upravljanja vodama, šumsko-privredna osnova) dužni su iste uskladiti sa odredbama ove Odluke u roku od 6 mjeseci od dana njenog donošenja.

### Član 31.

Ova odluka stupa na snagu osmog dana od dana objavljivanja u "Službenim novinama Općine Travnik".

Broj: \_\_\_\_\_  
Travnik, \_\_\_\_\_ godine

Predsjedavajući OV Travnik